

溫
熱
經
緯

溫

熱

經

緯

光緒乙酉年
松韻閣重槧

余讀孟英霍亂論在道光紀元之二十有八年閱三載孟英遊江
右余握篆宜黃始納交於孟英因得讀其同春錄仁術志諸治案
爲之編纂排比付諸剞劂以惠世人孟英知余耽情竹素積嗜成
癖所獲奇方祕籍恆郵寄相示拓我見聞而余每有所疑輒馳書
相問難孟英爲之條分縷析援古證今如冰斯開如結斯解披而
莊誦未嘗不撫案稱快數載以來尺書往復魚鴈爲勞夫疾疫人
之所時有也不有藥石患害曷瘳然而醫籍流傳途徑多歧聚訟
紛紜各鳴一得使後學旁皇眩惑罔決適從識者病之予恆欲廣
搜百氏兼綜羣言吸攝精華傾吐糟粕勒爲一書以質好學深思

之士而才識譴陋不敢自信欲俟資力稍充邀孟英共事揚摧成
斯盛舉浮沈數載而所志迄莫能償既而軍事興粵西賊起攻長
沙屠武昌陷安慶遂踞金陵江西左皖右楚以大江爲門戶大憲
議保甲議團練以固疆圉時余自宜黃改任臨川雖地居腹裏而
民氣素浮訛言繁興張皇旣虞生事優柔又恐養姦斯夕鹿鹿簿
書間而此事遂不暇計及未幾先君子捐館舍奔喪歸里干戈載
途道路梗澀乃取道長沙泛洞庭涉江漢當武昌之南湖流而西
至樊城棄舟登車攬許昌之遺蹟登大梁之故墟慨然發懷古之
思及渡河則桑梓在望故里非遙載馳驅將涉滹沱乃猝與賊

自來生民之疾莫重於傷寒存亡判乎呼吸得失決於一朝變化
萬端不容或紊而傷寒中溫熱暑溼之病證因非一尤易混淆前
賢所以各有專書互相闡發而斤斤於此也顧明於此者昧於彼
聚訟紛紛各鳴己得徒使好學之士無所適從而或過信一家之
言未免偏之爲害矣王君孟英該博淹貫引經斥異眾美兼收謂
前人之說旣已中肯何必再申己意因而棄瑕錄瑜集成溫熱經
緯一編蓋本述而不作之意而其中間以按語亦謂旁考他書參
以閱歷則亦猶之述耳而初非有私心臆斷於其間也僕懵不知
醫過從之餘竊聞緒論喜長沙之學旣得諸家表彰於前復得王

氏釐訂於後由是千秋絕業不致淆亂於羣言而四時五氣之感
亦不致難辨而失之歧誤其有裨生民之命豈淺鮮哉屬爲弁言
爰不揣譎陋而書之

咸豐二年壬子夏四月仁和趙夢齡序

遇遽折而東旅寓於豐甯之間蓋紆迴六千里馳驅五閱月而迄
未得歸也甲寅秋烽煙稍靖始得展祖宗之邱墓安先君子於窀
穸十年遊子重返敝廬間里故人半歸零落追念疇昔喟然興歎
居數月復以公事牽率買舟南下因得謁孟英於武林握手言歡
歷敘契闊而孟英業益精學益邃涵養深厚粹然見於面目余以
行迫未得深談惘惘而別已而孟英來答拜輿夫負巨篋置舟中
則孟英所贈書也舟行正苦岑寂得此奇編如親良友遂次第讀
之中得一編題曰潛齋叢書蓋孟英數年所搜輯言醫之書也或
表著前徽或獨攄心得或採摭奇方如肘後或區別品彙如圖經

匡坐蓬窗迴環洛誦奇情妙緒層見疊出滿紙靈光與巖陵山色
競秀爭奇噫技至此乎夫士君子能成不朽之盛業而爲斯民所
託命者其精神必強固其志慮必專壹其學問必博洽其蘊蓄必
深厚而天又必假以寬閒之歲月以成其志孟英懷才抱奇隱居
不仕而肆力於醫故所造如此豈偶然哉余行抵玉山遇城不能
前仍返武林就孟英居焉晨夕過從相得甚歡因并讀其溫熱經
緯經緯者蓋以軒岐仲景爲經葉薛諸家爲緯體例一仍霍亂論
之舊而理益粹論益詳其言則前人之言也而其意則非前人
所及也余於此事懷之數年莫能措手孟英已奮筆而成此書洋洋

灑灑數十萬言無一支字曼語孱雜其間是何才之奇而識之精耶異日由此則而推之各雜證力闢榛蕪獨開異境爲斯道集大成洵千秋快事哉余於孟英之學無能望其項背而孟英謬引爲知己殆所謂形骸之外別有神契者耶因備述顛末於簡端以識交誼之雅云

咸豐五年歲次乙卯端陽前三日定州楊照藜序

內經云天有四時五行以生長收藏以生寒暑燥溼風夫此五氣
原以化生萬物而人或感之爲病者非天氣有偶偏卽人氣有未
和也難經云傷寒有五有中風有傷寒有溼溫有熱病有溫病此
五氣感人古人皆謂之傷寒故仲聖著論亦以傷寒統之而條分
中風傷寒溫病溼暍五者之證治與內經難經淵源一轍法雖未
盡名已備焉陰符經云天有五賊見之者昌後賢不見遂至議論
愈多至理愈晦或以傷寒爲溫熱或以溫熱爲傷寒或併疫於風
溫或併風溫於疫或不知有伏氣爲病或不知有外感之溫甚至
併暑暍二字而不識良可嘅已我曾王父隨筆中首爲剖論茲雄

不揣愚昧以軒岐仲景之文爲經葉薛諸家之辨爲緯纂爲溫熱
經緯五卷其中注釋擇昔賢之善者而從之間附管窺必加雄按
二字以別之俾讀者先將溫暑溼熱諸病名了然於胸中然後博
覽羣書庶不爲其所眩惑而知所取舍矣非敢妄逞意見欲蓋前
賢用質通方毋嗤荒陋

咸豐二年壬子春二月海甯王士雄書於潛齋

溫熱一證庸手妄爲治療天札多矣夢隱憫之而作此書俾學者
行所遵循生平著述等身當以此書稱首眞寶書也烏程汪曰楨
讀而善之因爲之贊曰

活人妙術司命良箴不偏不易宜古宜今千狐之裘百衲之琴軒
岐可作其鑑此心

同治二年癸亥二月朔書於上海旅次

溫熱經緯卷第一

海甯王士雄孟英集

定州楊照華素園

烏程汪曰楨謝城評

仁和沈宗淦辛甫參

內經伏氣溫熱篇

素問生氣通天論曰冬傷於寒春必病溫。

張仲景曰冬時嚴寒萬類深藏君子固密則不傷於寒雄按傷

者爲傷寒不卽病者爲溫熱。

章虛谷曰冬寒伏於少陰鬱而化熱乘春陽上升而外發者爲實證。

金匱真言論曰夫精者身之本也故藏於精者春不病溫

此便知治溫病之法

王啟元曰精氣伏藏則陽不妄升故春無溫病。

尤拙吾曰冬傷於寒者春月溫病之由而冬不藏精者又冬時受寒之源也。

吳鞠通曰不藏精非專主房勞說一切人事之能動搖其精者皆是卽冬時天氣應寒而陽不潛藏如春日之發泄甚至桃李反花之類亦是也。

章虛谷曰。經論溫病有內伏。而發外者。有外感隨時而成者。其由內伏發外者。又有虛實二證。上條爲實證。此條爲虛證也。熱論篇曰。凡病傷寒而成溫者。先夏至日者爲病溫。後夏至日者爲病暑。暑當與汗出勿止。

王啟元曰。此以熱之微甚爲義也。陽熱未盛。故曰溫。陽熱大盛。故曰暑。

楊上善曰。冬傷於寒。輕者夏至以前發爲溫病。重者夏至以後發爲暑病。

林觀子曰。少陰真氣既虧。邪必深入。鬱久化熱。自內而出。傷寒

序例云暑病者熱極重於溫是暑病者其實熱病也

沈堯封曰傷寒有五熱病乃其一耳餘論俱散失矣

章虛谷曰此言凡病傷寒則不獨指冬時之寒也蓋寒邪化熱隨時皆有也

雄按脈要精微論曰彼春之暖爲夏之暑夫暖卽溫也熱之漸也然夏未至則不熱故病發猶曰溫其首先犯肺者乃外感溫邪若夏至後則漸熱故病發名曰暑蓋六月節曰小暑六月中曰大暑與冬至後之小寒大寒相對待是病暑卽病熱也乃仲聖以夏月外感熱病名曰暍者別於伏氣之熱病而言也說文